

四庫全書

集部

欽定四庫全書

集部

天台續集卷中

詳校官中書

臣張姚成

助教

臣常循覆勘

總校官進士

臣繆琪

校對官中書

臣范鏊

謄錄監生

臣戴朝琛

欽定四庫全書

天台續集卷中

宋

林師歲等

編

遊日山

錢暄

清晨渡水陟秋山日上高原葉葉丹已傍松筠尋磴道
更瞻臺殿倚層巒梁間雲氣蒸衣潤牕外嵐光照席寒
顧我塵勞嗟少暇暫驅熊軾一盤桓

葛闕

六時香火集宗雷日上雲收紫翠開應笑守麾公暇少
二年官滿一曾來

馬良器

雲外朝陽照古臺千巖宿霧一時開使君久負登臨約
今日朱轡特地來

周延雋

津頭催渡隔城陰祇苑探幽結客尋綠稻一川春後滿
白雲千嶂晚來深疎鐘流響猶含谷餘燼清芬尚襲襟

多愧空疎無夢筆敢期雜擬惠休吟

孔文仲

尋盡城中山又訪江外寺蘭舟涉澄漪隼旌入踈翠樓
臺初日升巖谷宿雲墜飛泉百琴鳴怪石萬虬躡絕庵
皆步登佳樹留客醉洞天生晝寒桃源發春意煙霞暫
深闊宇宙忽殊異海國遇升平鈴齋無俗事潁川擅才
敏康樂足情意只恐新詩多鐫鐫費年紀

趙企

背日西來眼界明，隔溪遙見梵王城。
旌旗夾道蔽山影，笳鼓入林聞谷聲。
青鳥向人疑有意，白雲迎客不無情。
夕陽臨水共歸去，明日紛紛塵事生。

郭三益

洗光朝日上旋旋，瑞色分臨此地先。
門迴帆收江市密，山深龍卧海潭圓。
靜然栢子聽幽偈，閑立苔痕問小禪。
莫訝潮平歸渡晚，斯遊有意已三年。

石公弼

嵐光咫尺見山扃
候得潮來一葦輕
慘慘晚堂看日色
森森古殿對江城
風敲寒玉驚僧睡
巖落淅冰認雨聲
不是平生曾到處
因緣今日此中行

題樗軒綫泉及聞琴

石公弼

竹引高山一綫泉
細如絲髮亦涓涓
莫嫌此去滄溟遠
流水更聽琴上絃

流花亭

高述

輦簷臨古岸
玉砌近重閨
指點尋僊路
留連勸酒人
水

流還似舊花落又逢春客到此亭下眷言休問津

章憑

亭榜得佳名山聚擁翠閨風流傳晉客談笑憶秦人水
出桃源路花浮洞府春未應迷俗駕行處是通津

陳與京

丹艧依巖腹翬飛枕碧閨應教臨水客頻問種桃人野
色低籠日溪光長占春僊槎消息便咫尺到龍津

郭三益

面幽連野色，審曲帶城閨。但見流花水，難尋避世人。
蟠桃知幾熟，薜洞謾長春。稅駕追前事，躊躇要路津。

俞純父

山溪窮洞府，江岸繞樓闌。曉艷嘗迷客，飛香尚襲人。
凭高能賦遠，祖別重傷春。莫惜離歌醉，曾聞上玉津。

遊碧照庵

陸長倩

松蓋松幢引步高，躋攀終日自忘勞。寒泉澄澈新鎔鏡，
華棟崢嶸下冠鰲。軒到嫩嵐濃欲滴，庵依疊嶂勢偏豪。

雙旌暮迫城闌去止觀回應羨毳袍

羅適

長松青似染高杉翠欲滴餘陰入軒來滿座瑠璃色達
人無六塵靜見照中碧庵內一爐香萬緣自然息

陸長倩

平旦前騶出郡闌松堤石磴自無塵寒雲明滅天開幙
霜草青紅地展茵靈剎迥非勞世境淨庵常屬悟空人
更憐萬竹千杉色不問嚴冬與早春

題延慶院

章得象

碧澗連龍穴層巒倚枯蒼無時似風雨繞院盡松篁路
僻人難到僧閑日自長勝遊應不負三度屆雲房

曾禱雨龍

潭立有嘉應致齋
祭謝三至於此

黃軫

寶刹標奇處煙蘿響亂流地靈僧得住山好客多遊燈
影連金像鐘聲散石樓風雷等閑作咫尺是龍湫

李經

桐栢分奇對郡樓
枯蒼真隱翠何尤
幽人選勝近龍穴
野客忽來忘虎丘
溪戶便將塵事隔
雲房曾遣宦情收
灰心到此方高尚
好學遺民結社遊

黃知良

松竹冷交陰
蕭森露寶林
門依青嶂靜
僧隱白雲深
淒切泉噴玉
莊嚴地布金
龍湫中致禱
朝夕冀為霖

題秀野亭

元絳

亭占青山口
郊原四望平
遙林連崦黑
白水隔田明
翠

麥波濤動飛泉劍珮輕長年便野趣擬欲解塵纓

題疊石山院僧壁

李熙輔

括蒼山上雲山好雲亦好可憐山下僧看雲不知老

吳可幾

緇客幽棲常苦吟水邊松下靜悄悄有時一室焚香坐
不以詩情廢道心

寄題開福院白蓮堂

米芾

二林消息已千年戲向池中種白蓮昨夜秋香逐霜雪

又看蓮子藕如船

舊多社客談因果
新向禪林問祖風
歸去萬緣無不了
這回洗鉢聽齋鐘

張景脩

玉色荷花自是僊
道人更慕遠公賢
此生欲結束林社
求取新詩十八篇

題共樂堂

錢 暄

疏就湖山秀氣濃
花林茂列景爭雄
管絃交奏客懽合

臺榭競登人喜同環嶂鷺行飛早晚平波魚陣躍西東
荒蕪芟去成佳致換得汀洲月與風

汪 泌

臨海城東湖氣象清且奇無風綠色淨十頃澄琉璃中
有共樂堂今其名者誰人有答我問太守下車時訪民
所疾苦民曰水最危其水或暴至城壞民流屍公謀得
上策疊石完城基外遺數百家室屋鱗參差水至無所
障適與漂溺期又欲隄其東苦乏土石資開湖足取用

隄勢橫虹蜺湖光占空闊物從鑑中窺紫翠前後山環
列如屏帷構堂就虛曠與俗同遊嬉太守宴堂上遊人
歌水湄歌云從公來除患補瘡痍況有此觀壯不樂何
以為有如登春臺人心舉熙熙從事能文者作辭書之
碑庶其不朽功上徹堯軒墀

柳安道

平波數頃萬峰前一片丹青畫不全幽榭小橋橫翠水
茂林脩竹鎖輕煙綺羅絃管追惟地雪月風花爛醉天

爭奈及瓜歸覲去湖山無復苦留連

姚舜諧

秀氣清陰日滿前仙瀛蓬閣景都全綵舟畫楫魚噴浪
綺席金爐麝吐煙懽勝更思明月夜飲酣惟恐夕陽天
屢陪公靜遊東湖常以城闌之阻為恨也主人報政榮塗近淮浙重遊路接
連

題山宮法安院

章得象

路入青青數里松上方樓閣一重重千尋練掛雙流瀑

六曲屏開四面峰幽鷺獨翹藏翠竹啼猿相對答踈鍾
留連不忍催歸騎回首斜陽煙霧濃

章憑

山家門逕鎖寒松更向煙蘿第幾重幽鳥啼花歸舊谷
應龍飛雨過前峰分持皂蓋歌千騎入冠黃扉祿萬鍾
一見高吟重興感清名長在木陰濃

題無垢院

張景脩

禪房閉深花錫杖生古蘚秋山翡翠寒春水玻璃軟無

嫌牆太低但恐路不遠何人坐長松令我思韋偃

石公弼

泐磴穿嵐造竹扉一軒幽敞坐忘機池鏡瓊骨容清泚
凭檻時看翡翠飛

淨界曾無一點塵風疎松竹響天真從來此意少人會
只道林間無至人

題東掖山承天院

姚舜諧

面勢崔嵬排斗牛東分一掖鎮丹丘玉毫金相祖師會

院有九祖閣洎寶帙琅函海藏流蒼檜茂林常蔭映白
十八羅漢堂焉

蓮香社共熏修

承天白蓮
舊同一院

紅塵斷處人難到俗駕經年

始此遊

予官此已二
年今方一到

章得象

聞說新庵號白蓮五峰環繞布金田虎溪社共何人繼
佛龕燈從幾代傳嵐色排空長似畫松枝偃蓋不知年
勞生已作歸休計願解塵纓結淨緣

東掖四絕句

石象之

入天台

溪岑縈繞紅塵外
殿閣欹危翠靄間
我見老僧無一事
老僧更羨白雲閑

不見如師

洗除塵垢訪名藍
不得相逢益自慙
松桂陰森香火冷
亂雲空鎖白蓮庵

隔塵亭

山椒亭榭適徘徊
病膜煩襟斗頓開
若有塵埃何處隔

此中自是少塵埃

白蓮庵

結社當年號白蓮
師心應欲繼前賢
有時中夜初回定
清磬一聲秋月圓

題靈康廟

章得象

白鶴何年入紫氛
空餘靈跡廟猶存
巖崖暗鎖雲根老
堂殿陰連海氣昏
潮上神烏鳴祭鼓
夜深鬼火照祠門
遼天歸嘆桑田事
應與麻姑仔細論

章憑

山邊清氣擁祥氛遺跡流傳漢史存金殿已頒新號美
劔崖猶隱舊痕昏據簷焚鼎驚魚市浮蓋呼風過海門
千里陰功誠不淺紛紛餘事豈須論

葛閣

符法千年人尚畏神林三鼓酒盈杯油囊為取天河水
更折蟠桃海上來

右迎神

丹霞縹緲海三峰歸去瓊臺第幾重仙驥一聲風馭遠
月明清露滴金松

右送神

韋羗山六絕

陳襄

去年曾覽韋羗圖云有僊人古篆書千尺石巖無路到
不知科斗字何如

盤盤英氣四紆餘定有神僊此地居天子正求伊與呂
如何不見起耕漁

天鞠精靈久貯儲中間豪傑出無虛鄉民世世家居此
爭使兒孫不讀書

峭壁回環幾百區其間巖石可耕鋤如何得片山如此
白首相將老母居

古意岿嶺與世疎一官羈絆可歸歟北山未及西山好
下有僊人結草廬

四友之賢世莫如白頭終作一鄉居此山不惜將錢買
歎息無因共結廬

韋羌山式公綠筠庵詩并引

郭三益

綠筠老初見息庵上人如印印水遂擁瓶錫歸尋
故山凡十年間應機度緣不可量數既而將卜此
庵以老也然余甚疑綠筠之名未足以彰幽託之
趣而老人謂余言曰法以空為實以圓為應以衆
微聚為境衆微無盡圓應無方空實無際綠筠者
衆微之一物而山中之高致也吾日與之相圓於
妙境而以空自樂彼其同吾之樂者而後知吾所

以名庵之意為不妄不然徒見其披風承露掃雲烟
而低昂者皆吾庵外事也余聞而系以詩焉

道人棲碧山雲居在空曲十年海潮音利物緣已熟更
尋妙高頂超然具幽築古木插空青寒筠抱巖綠時攜
貝葉書步入深林讀雲衣冷蕭條靜對含煙玉客來境
非喧客去境自足宵眠護禪虎晝引銜花鹿庵中三昧
語藥我貪嗔毒何當脫雙鳧藜杖追高躅

興道禪院

陳襄

今日登南塔愁懷不自勝年華催鬢髮身計憶岩稜道
業慙諸子根源畏老僧何當論去就細得問龜朋

福應山

楊 宓

清風送月上欄杆雲雨溪流破玉寒我有三峰高興在
漫堂聊作畫屏看

醉後愁生任數奇僧牕借夢入新詩覺來着意尋桃李
除了春風搃不知

張景脩

南亭不減北邙高美景因公見一朝已看溪山如在畫
更傳風雅似聞韶栽桃定有僊家住種竹寧無隱者招
秀氣當為多士福未應都放與漁樵

石雲

薛如初

洞府標靈萬古傳石雲呈瑞始何年人間欲待為霖雨
但看從龍起碧天

題多福院分翠軒

郭三益

平生但愛山中寺此日來看竹外山心境頓開清淨想

客塵無復更相關

題廣度院

羲和均四時曜靈有急節沈迷簿領書坐歎春事歇及
茲新雨收西郊初發蒼翠山氣嘉奔悍溪流活風驚
麥翻浪水淨秧抽髮漸窮蕭寺幽頓使煩襟豁蜂喧釀
蜜翅鳥落啼林血高僧日無事種朮畦畝濶綠苗已紓
紓紫花行復結吾欲訪長生終歲期採擷

凝真宮

章憑

昔人騰碧落餘地掃巖隈石壁雲長在松梢風自來暗
扉通浩蕩古蔓接崔嵬更欲窮幽隱僊源路已回

張無夢

五雲深鎖洞門深躡屐攀蘿特地尋烟靄不藏塵外路
神僊遺下水中金喜遊汗漫華胥宅重憶崆峒至道心
不得方平同一醉紅霞零落我鐫琴

薛如初

仙翁曾是便升真靈跡千年事轉新碧洞峰前開紫府

清溪門外隔紅塵祥雲瑞靄籠金殿羽蓋霓旌擁玉晨
今日勝遊誠有遇麻姑留我醉經春

福延院

許操

一山屈曲如回肘前有虎眠當水口陰森萬木綠參天
秀色崢嶸欲飛走神仙渺邈不可問簫鼓尚能喧耳否
朝風暮雨無歲年應是蒼苔暗科斗

麻姑巖

葉發

怪石倚空碧傳有神仙迹元放古來遊孝先舊曾歷山

前無斷碑往事杳難覓麻姑去不來青鳥無消息

滌慮軒

岑象求

聖人重洗心君子貴浴德清心是道場金仙有遺則人
言我慮不須滌我謂幾人能滌得以此息萬緣以此銷
六賊君不見水觀月觀成道人盡向此門生妙識

虞 策

禪翁自說逢迎懶向此開軒最所宜地僻風塵非我事
夜深水月幾人知沈觀萬境皆無物笑指三乘亦有為

行客暫來良自省不堪勤瘁鬢成絲

劉 彝

萬事本無心寧容意慮侵方池唯貯月脩竹不棲禽地
靜饒真趣風長展梵音有人重稅駕經宿樂幽林

左 譽

過眼浮雲是也非桔槔俯仰政兒嬉欲知身世俱無染
看取蓮花在水時

洗盡塵機萬慮空胸中冰鑑許誰同今宵正可談風月

借問何人是阿戎

崇教寺筠軒

羅適

夜憶清軒上都忘居會稽秋聲先在竹月色最宜溪銀
漢簷前直玉繩天外低何人倚欄檻為聽下莊雞

張景脩

碧玉牕櫺三四間一溪流水伴君閑雪中惜取青青節
不用開林自見山

淨土院

楊傑

巖谷連天嶺杉松徹象山路從雲外入人自海邊還禪
榻紅塵斷經窻白晝閑玉蓮生有處香滿翠微間

虞 暮

法界惟心現真風觸處涼具茨非有路建德豈須糧地
僻遠塵世境幽閒妙香此山斯淨土不必徃西方

孫大廉

流水元依澗孤雲不着山萬緣機慮斷一點淨明還立
雪人何在街花鳥自閑羣昏疑網破雄論落人間公有淨土

決疑序行
於時故云

白蓮開綠水佛子舊家山淨境無南北塵心有去還林
深天籟遠風定水雲閑何日逢旌騎重來翠巘間

石橋

趙抃

曉登山閣一爐香瞻企神僧最上方人度石橋何所畏
如來元是世津梁

楊蟠

金毫五百幾龍尊隱隱香山聖迹存方廣寺開無俗路

優曇花現有靈根一峰突岸臨天壁雙澗淙橋透石門
今日不將心洗盡更從何處覓真源

李復圭

石梁嶠屺據雙流異跡嘗聞記道猷五百真如誰化滅
三千色界妄探求燈龕焰古長年在茗盞花濃繼日浮
靜境少留塵慮息松風蕭颯又驚秋

姚 萼

萬派鏗鉤走電車跨巖蚬蜆玉虹斜靈禽飛下傳消息

五百甌心結茗花

郭茂倩

石橋庵下少徘徊
雪暗松林撥不開
坐久無人天向午
雙鳥飛上施生臺

羅適

傳得梅檀相甚奇
紺容光徹照須彌
橋頭尊者來瞻禮
應憶靈山聽法時

飛瀑斷巖路天然
石似梁始知融結
日便作聖賢鄉水

靜魚龍樂山靈草木香
茶花本餘事留迹示諸方

張景脩

天與晴來抵萬金
更逢詩伯共登臨
輟公一夜楞嚴講
慰我十年方廣心
白雪陽春雖寡和
高山流水有知音
石橋天下無雙景
好盡平生得處吟

余 樊

雲藏鐘鼓霧埋林
龍護山花雀散金
知道有人橋外住
青崖遮斷不教尋

蒼崖清澗竹嬋娟紫閣丹樓磴道連我是夢中曾到此
故將香火記他年

張康國

路轉下層崖亂石通微徑山深萬象虛葉脫千林靜連
苔蒼欲橫袞雪飛泉迸有靚舫可言寒煙日向暝

周之深

地險知人特地來猿禽意思也徘徊遙瞻聖境真如在
休問石門開未開

章憑

昔聞天台山方廣寺尤勝石梁元自成茶花隨所應見
此絕世蹤嗟我拘三乘更聽寒泉聲不獨發清興

樓光

溪流長卷千重玉茗椀齊開五百花方廣只留方寸地
不須辛苦上仙槎

石郊

行破白雲山幾重僧床投宿幸相容泉聲到枕夜無寐

時聽隔林方廣鐘

太史章

澗底輕雷噴玉泉
石橋僧度是何年
靈峰斗隔人間世
真境潛分洞裏天
施食曾聞龍就掌
談空應有虎當筵
道猷雪涕非無謂
誰見湔腸掛木顛

陶谷

重重翠嶂聳雲端
玉殿金樓縹緲間
聖境不容凡俗到
故將飛瀑隔塵寰

桐栢崇道觀

章得象

萬仞攀蘿上翠岑，豁然平地九峰心。
參差珠樹和雲出，咫尺丹霄有路尋。
洞口碧畦長種玉，壇邊古篆欲生金。
桑田未變桃先熟，唯見蓬萊水淺深。

張無夢

桐栢觀周市千峰累翠螺，地高陰氣少天多。
三井雲雷起一壇，鸞鶴過誰言紫微。
後無客繼仙科。

元積中

九峰魏絕亂雲屯石室瓊臺舊址存山嶮密盤之字徑
洞深高闢丙方門碧桃花爛春溪煖紫玉簫沈月榭昏
未覺壺中光景晚人間歸去見來孫

楊愈

深入黃庭景徒思五滴泉青牛眠藥塢白鹿卧芝田浮
世人空老長生事宛然三尸飛不去皆是自留連

葛閔

昔賢書洞石臺有伯陽經碧海船多却金霞夜不扃爐

成九轉藥階布六符星捷徑非君意深遊不死庭

余 葵

乘風御雲氣來訪真人家玉闕散朝景瓊臺煥晨霞高
臨太元天下眇赤水涯陰魄位霜采陽精發丹華桐君
奉玄書姹女弄絳紗祥虹混五色神芝秀三葩煌煌王
母居飄飄紫皇車飈輪動無跡風馬去亦賒矯首揖浮
丘躡屐追皇媧珠宮俯台斗石梁礙流槎操持却日鞭
跨踏食月蛙龍旗拂煙驚鶴袂策雲斜清都隱虛無金

庭鬱塞我橫霄雜美氣空界流浩波囊籥勞吹噓吐納
煩羲和倏爾度灰劫超然絕塵羅靈簫步何徐玉斧鬢
已皤飛駕逐鳳吹斑駘奏鸞歌寧留飲青精幸我栽胡
麻交梨瑩肝膽火棗醒齒牙咽漱華池津咀嚼碧奈花
有待越三井思慮無由邪

太史章

神仙隱居尚深渺徑迂不欲與世通必求峭拔出林杪
俯視左右環羣峰飛泉不測源所自瀑注一落千丈虹

步躋石磴旋

去聲

盤折翠蔭蒙密多長松唐聞馬練師晉

傳葛仙翁丹灰已死不復熾獨有翰墨留遺蹤定知華

表立歸鶴誰見靈湫藏蟄龍白雲子信亦稀貌入聲視聲

利如塵泥仕途捷徑非我樂不死之鄉終欲歸玉霄峰

前煙撲撲金庭宮外雲霏霏哀猿嘯斷月不古桃杏得

春還滿枝風馭寒寒何處在孤墳棺殮只空衣

李仲偃

妙道心期赤水求隙駒光景任川流朝真淨界瓊臺月

滌想鮮飈玉宇秋
芝茹薦盤香露散
茶腴烹鼎綠雲浮
勞生可念榮華束
食頃邯鄲枕上遊

僧長吉

太帝天壇渤澥連
金霞蒼壁隔埃塵
蓬丘不斷青禽位
仙仗時來白鹿輶
星籥豈惟壺內景
桃花長媚洞中天
優游笑把洪崖袂
瞬息人間又幾年

國清寺

畢士安

三四百年寺今來
國又清若非逢聖
祚徒自有嘉名月

殿五峰色風松十里聲不緣君命來便好脫塵纓

陳堯佐

南越第一寺偶來心地真却嫌橋下水流去入紅塵

章得象

松韻蕭騷十里清入門毛骨冷如冰題詩已有丹青筆
悟法應多黑白僧風雨只疑雙澗瀑星辰長認上方燈
來遊不是忘機客誰到雲峰第一層

葉清臣

紺雨初成國已清
十靈慈護屬仁明
山僧了得真空觀
好續爐薰傲太平

趙湘

物外千年寺人間
四絕名兩廊諸嶽色
九里亂松聲海
氣標僧院秋鐘徹
縣城夜來疎磬斷
月影遍樓清

蘇泚

自嗟靈骨久埋淪
惆悵當年舊事存
青眼重開蕭寺路
無人隔夜掃松門

史 縕

十里松間路門開對洞天
山神曾獻地海衆此安禪
鐘磬開巖谷樓臺跨石泉
高峰智者塔長與赤城連

李元凱

智者高蹤接沃洲
石渠仙職我同遊
已無月桂籠禪室
猶有祥雲鎖寺樓
疊砌峻嶒封碧蘚
五峰蒼翠覆寒流
却緣王命相拘束
不得躋攀最上頭

姚 萼

梵宮四面五峰巔
兜率臺高倚翠巒
曾有寒山重到此
倩誰試與問豐干

三賢堂

楊傑

豐干

來從清淨土
鼎足聖賢聚
騎虎歸故鄉
世人猶未悟

寒山

家在天台寺
雲巖萬丈寒
本來人不識
饒舌是豐干

拾得

拾得元無姓山前拾得來有時攜掃帚不為掃塵埃

張景脩

如是國清寺宜乎天下聞水聲常夜雨山氣即朝雲今
古三賢隱仙凡兩路分唐人書畫在明日更慙慙

大慈寺

葉清臣

佛隴光沈茂草平樹林猶作誦經聲一心三觀休分別
秋靜山高海月明

蘇
澥

身去寥寥無朕迹此時誰會真消息黃金靈骨今尚存
指示世人人不識

題幽石

太史章

痕疑神所鑿不與衆巖俱鎮地形何直參天勢自孤鶴
栖喬木穩猿攬古藤庵欲得丹青手和雲畫作圖

題望飛泉

既晴安得雨霏霏不道流泉落翠微側帽試看繩引處
破煙千點濕人衣

題宴坐石

白雲曾罩定中身石上雲歸不見人應有山神長守護
松風時為掃埃塵

石端誠

飛流噴雪散層巖
銳水無時瀉屋簷
客夢夜回疑是雨
起看牕戶有明蟾

水索

擇龍何用更橫空
一線長繩引水通
頃刻能周清淨供

漢陰端謝桔槔功

護國寺

錢惟演

峻極壓滄溟清居聚百靈重門深閤邃絕澗遠湛冥客
間無生法人遊不死庭何當謝簪組鳥道駕飛輶

錢惟濟

穹窿台嶽壓重溟中起青鴛接福庭新好天花經雨墜
清涼甘露隔宵零金繩界道連飛布碧樹周阿繞翠屏
異日功成解纓去矧期同擷五芝馨

送僧歸護國

趙況

振錫攜瓶謁未央
薜蘿衣濕惹天香
曉辭丹陛君恩重
笑指舊山歸路長
何處漱泉吟夜月
幾程聞雨宿雲房
他年松下敲門去
應許塵襟拂石牀

石義叟

雲房春鎖赤城邊
紫著蘭芽謝勝緣
鑾殿暫來趨玉陛
石橋重去掃金田
牕噴瀑布千岩雪
爐爇梅檀一炷煙
此處深居更誰見
臘高松偃舊峰前

阮思道

碧雲高價徹天涯
珪璧清無一點瑕
雙闕再承新雨露
三吳重賞舊烟霞
水軒散味朝賢句
松院分嘗御府茶
聞說赤城終未見
盡圖何日寄京華

舒雅

偶思皇澤來丹闕
却為禪齋返舊林
嶺上白雲終掛念
人間餘事不關心
澄潭雨過秋涵月
古檜風生夜對琴
聞道石橋多勝境
幾時相伴一閑尋

張肅

去謁吾君遇太平
太平明主重南能
不關名利真開士
却返林泉伴野僧
御賜白金為長物
身歸青嶂策枯藤
只應待到天台日
齋炷檀煙定有燈

王化基

振錫詣華京
頻頻答寵靈
玉階前見佛
金口內開經
論道窮幽蹟
探玄極杳冥
褒崇恩爛熳
教化語丁寧
傳作心中印
鐫為座右銘
雲飛來北闕
鶴夢去東溟
鼓棹辭

梁苑揚帆過洞庭到山開御札鸞鳳滿巖扃

歸然傍勢浙江東不羨金庭第一峰法境常清五十里
妙蓮今現幾千重清涼解洗枝頭露變現能飛鉢底龍
平日舊遊今復到蒼崖邃谷抱長松

劉阮洞

吳師正

天台春暖蘭若馨海榴噴血黃鳥鳴風晴雨霽洞天曉
畫屏有路遊人行劉郎阮郎剡溪客結伴窮幽絕人迹

洞口遙聞漱玉聲

洞有鳴玉澗也

時有飄英點溪碧捫蘿涉水

前攀綠簷見勝景層巒巔天桃瑤草蔓深谷飛樓傑閣
凌青煙潭上金橋跨龍背綽約雙鸞飲潭水初疑帝子
別瀟湘珠珮珊珊移玉趾環姿瑋態躊躇久熟視人間
未嘗有羅幙深沈邀客留胡麻為飲椒漿酒問郎於此
何當還壺中景迥非塵寰客驚遽返覓閭里子孫雖在
皆重玄年華瞬息嗟浮世往事分明如夢寐相與迴尋
舊路悲亂山稠疊烟雲蔽我來躡屐觀遺蹤松陰坐久
曾不逢野僧相引下山宿落霞斜日林梢紅

鄭至道

採藥歸來世代賒
洞門方此掃煙霞
碧潭清泚弄明月
翠巘高低飄落花
芳草已迷當日路
白雲空想舊人家
自慙不是浮觴侶
謾向山前醉帽斜

王漢之

洞府門閑白日賒
碧潭清影照雲霞
弄珠人捧江臯珮
刻玉巖開閬苑花
風月有情回俗駕
塵埃無處問仙家
歸來悵望金橋外
露滴桃源一逕斜

二女春遊閨苑花醉邀劉阮飯胡麻仙衣忽逐笙簫去
空倚山頭恨落霞

王沔之

流傳晨肇隱無蹤搜發仙源屬鄭公百尺靈泉清澈底
千尋蒼玉勢凌空飄香故跡人雖到採藥巔崖路不通
二女深沈斷消息桃花依舊笑春風

毛漸

洞門流水日潺潺桃塢依然枕水邊春色年年花自好

遊人誰復遇嬋娟

題萬年妙蓮閣

錢 勰

應真飛錫霑靈蹤
智者遺杉尚灌叢
寶構迴臨清鑑上
妙蓮高擢汙泥中
甚深祕藏資談席
最上真乘振祖風
嗟我拘攣猶未歷
坐馳神爽愧興公

王欽臣

石橋飛錫斷遺蹤
揮麈談禪想舊叢
萬萼蓮新青嶂外
十圍松老白雲中
他年宴坐開華構
當日咨承擬順風

金匱山房詩集 卷中
歲晚丹丘如可約杖藜相引欲煩公

呂穆仲

千尺杉前帝釋宮種蓮不用百花叢
石橋路近橫天外池水光寒坐鑑中
紅日几窻新活計白雲香火舊家風
虎溪社客今憔悴此意憑誰謝遠公

宋景年

上方危閣化無蹤平顧摩空萬桂叢
自有蓮華發泥下何須芝草遍山中
石橋暮隔霏霏雨翠壁寒供凜凜風

彈指憑誰開戶牖向來禪觀仰羣公

楊傑

天台有新閣勝地近塔廟灝浸碧瑠璃
公回出山嶠蓮生淤泥中白玉有明竅
華實相表裏光色互炳耀處空不染著
烈火豈能燎寶藏諸如來端坐演法要
青目付上士不待舉花笑芬香初洞達
宿痾已能療淨土託珎芭機感願力
召三時有開發一本常寂照不讀智者書
焉知此蓮妙

羅適

華頂西邊天姥東妙蓮開閣對羣峰清含銀漢三千界
香透金庭第八重畫棟有聲啼海燕澄波無影睡天龍
夜深講罷何人見雲在青天月在松

蔣之奇

佛隴遺芳鮮儷蹤主張三觀揭禪叢圓明珠繫衣襦裏
淨妙蓮生濕淤泥中再現石橋真法界重興銀地舊家風
未應賦述誇孫綽序偈稱揚復有公

福聖觀

李建中

永懷閑訪道斗上上仙居
瀑水磬聲外桂花林影踈
山名孫綽賦觀額葛玄書
已負秋來約誅茅興有餘

余爽

九峰回合抱瓊田
石蕊雲英漱瀑泉
聞說丹成從此路
玉虹芝駕上青天

紫府金庭太帝宮
露壇蒼檜響天風
上清神虎何年見
雲錦空傳兩玉童

子晉鸞飛侍帝班
吹臺今在碧雲間
高秋白月霜風夜
時有笙簫赴洛還

張無夢

台山小隱十餘秋
曾伴仙翁處處遊
瀑布長流天上雪
翠屏高倚洞前樓
雲堆華頂尋鸞馭
月滿靈谿狎海鷗
此地重歸別得路
赤城玉府透瀛洲

姚祐

織女機成未剪裁
練光浮出五雲開
日邊瑩彩憑空落

澗底寒聲動地來，望徹九霄人錯愕。
勢傾三井雪崩摧，卧龍欲起為霖雨。
肯逐洪波去不回。

王介之

奔雷漱玉向高秋，長伴神仙出衆流。
下得碧山終未足，待歸滄海始應休。
雲饒淨色依依歛，猿傍寒聲歷歷愁。
別有千尋在何處，廬山南面虎溪頭。

赤城崇善寺

夏竦

丹壁排空峭四濃，上真應此駐靈蹤。
煙沈曉日明孤頂，

雲破餘霞出半峰
巖下法師曾伏虎
洞中天子屢投龍
他年翠輦東巡狩
玉牒終須受大封

玉京洞

余爽

羽駕歸來洞已扃
洞門深鎖讀殘經
瓊臺一覺仙都夢
不覺松根長茯苓

東臨滄海宴羣仙
候入桃源小洞天
一局殘棋銷幾劫
不知人世已千年

半山松栢散天聲
芝蓋當年憇赤城
我是上皇芸閣吏

玉京應有舊題名

先照亭

李復圭

危梁上下慶雲端
禪刹翬飛挿翠巒
華藏貝多藏祕典
香廚莆塞供珍餐
回廊跨壑千重峻
懸溜當空六月寒
盤礴迥知靈秀境
極高方見地形寬

葉清臣

一徑涼飈響萬松
青霞紫霧祕靈峰
寒生列洞前溪雨
聲到諸天午夜鐘
仙頂月高猶駕鶴
陰潭雲起舊降龍

出塵境界無多地已上金庭第七重

妙智寺

陳白

台嶺名將方丈齊當年曾說二仙迷無人再得洞中信
空有桃花落剡溪

排危步步上天梯喬木蒼蒼拂紫霓白日莫催琪樹老
清宵應見玉繩低雲蒸巨壑金虬蟄月落高巖翠羽棲
况復仙翁丹井在碧霄岐路不須迷

八重峰頂望羣山百谷東流去不還惟有右軍遺跡在

月波時落墨池間

登華頂峰

馬域

遊山須覽勝八百里天台若不登華頂渾如不到來

孟觀

偶因華頂宿擡手摘星辰不敢高聲語恐驚天上人

鮑朝賢

藍輿直上八重峰千里秋蟾咫尺中寄語塵寰高會者
清光不與世間同

天封寺

劉丹

桂旗芝蓋翳濃陰
嚴宇崢嶸枕榛林
蜺座有花和法雨
龍淵如鑑徹焚金
錫枝化去圓泉在
石誌文昏亂蘚侵
塵壤漸遙天路近
慈雲輝物已灰心

別天台

趙企

攜家隱青山
青山不我留
遣我出山去
再拜辭丹丘
王命急星火
駕言促西遊
朝遊白雲城
暮宿黃花洲
佳人牽我衣
挽斷不回頭
路傍立樵叟
問我何所求
長安美

少年氣槩凌清秋鸞臺與鳳閣一一皆俊游掉臂爾欲
往獨不愧且羞此言真吾藥口訥不易酬我本麋鹿性
直與山林投云何就冷局歲月空悠悠願公看我還長
歌賦歸休



天台續集卷中

欽定四庫全書

集部

天台續集卷下

詳校官中書_臣張姚成

助教_臣常循覆勘

總校官進士_臣繆琪

校對官中書_臣范鏊

謄錄監生_臣戴祖單

欽定四庫全書

天台續集卷下

宋

林師歲等編

懷天台進禪師

錢惟演

默坐理情條虛齋息衆囂
寥區指梯米身世諭芭蕉
雨住階生蘚風嫌樹有瓢
惟思白蓮社他日許相招

送張無夢歸天台

慎壩

暫御懸輪謁晃旒却思揮袂揖浮丘
日邊已奉崆峒問

塵外還隨汗漫遊玉座榮頌天藻麗石橋危過雨苔秋
吾皇清淨延高蹈雲水無心本自由

杜幾先自浙東還與余相遇於金山話天台之異

以詩贈之

蘇軾

我夢遊天台橫空石橋小松風吹箇露翠濕香嫋嫋應
真飛錫過絕澗度雲鳥舉意欲從之脩然已松杪微言
粲珠玉未說意先了覺來如墮空耿耿窓戶曉羣生陷
迷網獨達古先少杜叟本何人長嘯萬物表妻孥空四

壁振策念輕矯遂為赤城遊飛步凌縹緲徜徉不歸舍
屢為瓠壺繞何人識此志佛眼自照瞭我夢君見之卓
爾非魔嬈僊葩發茗椀剪刻分葵蓼從今更不出閉戶
閑騷裏時從佛頂巖馳下雙蓮沼

次韻周邠寄鴈蕩山圖二首

指點先憑採藥翁丹青化出大槐宮眼明小閣浮煙翠
齒冷新詩嚼雪風二華行觀雄陝右九仙今已歷京東
此生的有尋山分已覺溫台落手中

西湖三載與君同馬入塵埃鶴入籠東海獨來看出日
石橋先去踏長虹遙知別後添華髮時向尊前說病翁
所恨蜀山君未見他年攜手醉郾筒

和鄭閬中仙居十一首

陳襄

我愛仙居好三年理尚寬民雖離網罟政未息波瀾

邑民

云水之後州縣科須不護已者常日有之憫物刑多省勞心席少安祗慙無

惠術永配古人難

我愛仙居好民淳不用拘閭閻興禮遜囹圄長榛蕪網

閭姦逾少風恬惡自無一年人已信感激謝張弧

我愛仙居好臨民必以誠簿書無日暇獄訟積年生

予始

至邑豪民有以積負憑折細民田土者迹駭分明予治而歸之或有年深而無稽者亦妄訴詞訟三年分戶二千凡有產而無業積年空納其祖訴而還主者不可勝數百疾求箴補千鈞待準平

嗟予不如古斯道未能

我愛仙居好安民去百姦誠心雖照物政體昧循環喜有條綱立慙無教令頒二年憂且病王事豈能閑

我愛仙居好慙無德政馨下車時問疾治獄日空囹圄老

吏貧歸里

有老吏徐彬者貧無以自給每歸耕田里數月而後出聽之

蒼生餒在庭

惟憂澤未至豈敢瀆邦刑

我愛仙居好園池日退居馴禽來鶴鶴野水進徐徐

園鑿

新沼引水經竹林間以環流釣翁臺習坎嘉魚二亭

草樹通樵採

園有短垣薪樵桐子之屬時為

邑民所拾

桑麻有老鋤猶言民未樂更待寢刑書

我愛仙居好家無十數人民窮惟有疾俸薄不知貧弟

妹閑成僻妻孥老未淳自餘無所恨寸祿及偏親

我愛仙居好公餘日在房憂民極反覆責已未周詳法

律行隨守詩書坐滿箱老來須向學多病喜平康

我愛仙居好隆儒尠大方諸生令講藝童子俾升堂

予每

講書罷又令諸生側講轉相教授公暇每有買地興民

童子十數人至堂上教授經書或試之詩云

學因孔子廟後修起學舍買三家之地以廣其基驅車下黨庠

予每出行諸鄉遇有小學則下

以觀童子三年邑未化官滿意彷徨

我愛仙居好經營盡國工庶民心喜悅小邑勢尊隆萬
瓦如雲合千題不日龍自非仁惠術愧子一觀風

我愛仙居好官卑分已盈才非漢循吏道似魯狂生擊

析心雖樂觀民志未平寧如孟子不食去齊卿

通判國博命賦假山

去年水潦百穀死居民無食食糟粃州之餓者數千人
黃岩之民猶倍徙携持老少出城郭盡徹牆屋無居止
鬻妻棄子人不售價例不復論羊豕白日市井聞號叫
夜堆廊廡如蟲豸縣官哀憐發賑救一飯纔得一盂爾
出門未暇充喉咽已有數十填溝水我時過之不忍顧
往往悲咽胃填委豈無智慮裨萬一遠地不得號君耳

錢侯作倖忠且仁悲憐餓殍如親子日開官廩與之食
又令豪右發儲峙昨日馳書白轉運披陳肝腎獻金矢
更乞兵儲二萬斛民之大命方有倚侯從新年作假山
自聞民饑不得視非無泉石可盤樂人今方瘁何能喜
願侯勿遽愛此山念此腰臘存狐蟻天無疾癘五穀熟
生者保聚歸田里此山之石堅不堅將與侯德無窮已

寄謝三井山禱雨

曾禱神龍井雲林杳莽間蘋蘩朝薦廟風雨夜離山百

里田疇熟一年囷圀閑因循失報謝石險路難攀何年
脩廟貌棟宇已摧殘牲幣三時少風泉四月寒野僧多
稌穰古木有杉櫟深欲重脩葺蹉跎又解官

仙居縣巖老堂

手持養性書此地學樵漁身類龍蛇蟄情忘木石居先
迷成遠復正靜得中虛何必求深隱幽蒙是所廬

馬篠潭報雨

并序

縣久不雨祈馬篠龍既應縣令陳襄作詩以報之

皇祐歲庚寅陰陽久鬱堙二時愆雨澤百物閔膏屯穀
價方翔踊民言備苦辛原疇無播種道路有饑貧縣令
憂忘食齋房退省身朝歸占甲子莫出看星辰埜祀曾
徼福雩壇亦禮神祈求觀古法詢訪得龍津遣吏蘋蘩
潔齋書肺腑陳靈泉汲坎窞仙仗下嶙峋雷斧潛噴樹
天波忽灑塵音官沉鼓吹市戶濕衣巾降應聲何速盤
桓志未伸經綸惟四日滂沛即踰旬萬谷山源發三農
水利均趨田多耒耨入里少芻薪苗稼晨爭插坊庸夜

不巡謳謠興父老燕集喜賓親捐瘠瘠中壑生成賦大
鈞邑人多忘報世世荷深仁

次韻和長吉上人淮甸相逢

梅堯臣

淮上一相遇憶在京都時雖驚歲月換未換松桂姿童
侍兩三人餅錫相與隨自言東越來篋中多好詩文字
皆妥貼廣術無傾欹前輩嘗有言清氣散人脾語妙見
情性說之聊解頤始推杼山學得非素所師此固有深
趣吾心久已知橫琴乃玄悟豈必弄鳴絲古樂衆少聽

誰知彼吹簫師曠沒世後伯牙終身悲願同黃鵠舉遠
歸滄海涯老驥雖不病長坂安可馳天台況奇勝日久
勞夢思尚忝齒纓綬終年趨路岐俯愧淵中魚游泳水
之湄仰羨雲中鷲凌厲辭縈維居常起斯念未嘗情不
怡今朝更道舊感愴各嘖眉同游謝公門遠想袂霑洩
惜哉胡不仁碎彼東方琪又出數紙書手澤尚可披眷
眷疇昔意於今當語誰復贈三百言玩味自挽髭序述
盡成故慨吟良有資其詞何疊疊宛若對風規泠然聳

心目不覺整冠綈重以超俗韻顧予賤職司是猶猿鳥
情並此驚櫪卑報投仍勉強實謬匠者為應哂不量力
短兵茲已疲

淮甸遇梵才

久已厭官旅故茲歸江南始時遽辭邑不及事春蠶殘
臆猶在道險阻固所諳扁舟次淮海喜遇釋子談契闊
十五年尚謂卧巖庵偶見如夙期淹留良亦甘歎游獨
泣然懷悲情豈堪班班雲中鳥共看投夕嵐下念舊山

隱山水唯素耽我從湖上去微爵輕子男

送崇教大師惠思歸山

潘閔

受知聖睞與誰同師號封題寄梵宮為謝國恩來闕下
又承天澤去山中禪餘靜對江亭月吟苦涼生海樹風
若到赤城逢羽客但言孤鶴在金籠

閔師自天台見寄石枕

林逋

斲石自何許枕之懷赤城空廬復蕙帳旦莫白雲生

送文光師遊天台

天姥山深搖錫枝野芳春翠共巖巒松門過水無重數
石壁看霞到盡時閑避鳥啼應作觀忽逢人跡自留詩
秦中河朔嘗遊覽莫恨此方行脚遲

送僧遊天台

石梁天絕赤城深影落滄溟幾萬尋金策若回聊為說
慰予終老愛山心

送天台邦師

楊傑

天台邦公善琴與詩時稱僧之雄琴盡古意詩得古風

自云天聖景祐中蹤迹猶飄蓬大淮南北長江西東人之奇者必就見景之勝者多遊從爾來五六載不與當時同髮白體且瘦所適多踈慵却擔一枝筇歸老天台峯

送羅提刑

鄒浩

滄溟可枯山可移公心獨與天地期田間經術入州縣所至父老均兒嬉明明日月照肝膽謂言吳民方阻饑回車為我作豐歲要令國體無瘡痍買臣郡去不持節

季真逸請非康時幾年夢想在松檟再拜一觴今得之
鄉人擁路識忠孝雅慰平生良可知恩光到此何以報
行矣二浙如王畿

答天台吉公寄茶

宋 祁

山中啼鳥報春歸陰閭陽墟翠已滋初筍一槍知探候

亂花三沸記烹時

陸氏烹茶每以三沸為法

佛天雨露流珍遠帝苑

仙漿待汲遲

上都惟乏佳泉故茶味差減

飲罷翛然誦清句赤城霞

外想幽期

寄台守劉襲明

許景衡

江入章安波浪寒仙山縹緲在江干二千石是誰為守
三十年前好長官聞道漁樵安里社從教風月落杯盤
新詩別後知多少更借隣翁洗眼看

薰然和氣破春寒見說專城冠越干訟牒不勞揮翰手
歡謠好付採詩官獨慙聖世人三黜誰怕仙山路九盤
但得白頭長鬪在莫辭青眼重相看

送黃巖宰李彥侯

委羽人物已仙去陳迹風流猶至今
隱吏向來慚懶散
令君此去好追尋春歸山奧十里雪霜後園林三寸金
況有左生詩句好一罇端為伴高吟

自咲當初作底官只應山水得盤桓
江樓風月傳觴後
邊塞塵沙行路難閭里樵漁無失業歲時簫鼓有餘歡
十年父老今何似為我從頭問訊看

次經臣見寄韻

召節來金闕扁舟望石門
家山秋渺渺煙水暮昏昏竟

失臨分約徒傷遠別菟慙懃謝池月相對宿江村

次韻經臣見贈

犬羊無故事喧爭惆悵中原失太平天上風雷方鼓動
人間草木已忻榮共懷前日千齡遇誰使蒙塵萬里行
淚眼時時望滄海百川渺渺向東傾

寄左經臣

二年南邑好相看誰道忘形最較難別去光陰驚倏忽
春來書信喜平安如何柳市多時住不向橫塘一笑歡

節物慳人詩興懶多應閑處凭欄杆

敏叔除祠曹以詩二首寄之

掉却淮南好郡章
歛然馳駟對天光
有誰更草詩人告
應數從前水部郎
霄漢豈惟收舊物
鬢毛毋苦嘆新霜
十年尚有南昌客
塵土昏昏只恁忙

趙子相逢關塞間
一聞消息破愁顏
也知念舊心猶在
頗怪題詩寄尚慳
已分低頭從簿領
却因歸夢見江山

俱依風月應長好
誰似先生耐得閑

謂方彥得也俱依
同在天台州方居

其旁

敏叔見和再依韻謝之

曾錄新詩數百章
簡編從此有輝光
當年俱是江邊客
今日早為天上郎
竹葉一罇魚似玉
梅花三弄月如霜
邊城樂事還隨分
莫笑終朝有底忙

分明喜色滿眉間
誰怕霜毛作老顏
況有杯盤留客醉
不教風雨為人慳
子真最愛橫塘水
居士新遷巾子山
惟有詩壇小工部
吾君未肯放教閑

自黃巖縣舟行入台州

陳與義

宴坐峯前衝雨急黃巖縣裏借舟遲百年癡點不相補
萬事悲歡豈可期莽莽滄波兼宿霧紛紛白鷺落山陂
只應江海淒涼地欠我臨風一賦詩

送小白上人歸華頂

僧秀登

瀑濺安禪石秋雲鎖碧層一峯如卓筆幾日策孤藤樹
偃前朝蓋星輝下界燈超然歸此處心已契南能

送貫微歸天台

秋歸赤城寺幽興難相同迹與片雲合心向萬境空傾
耳霜樹猿吹衣瀑布風後夜越溪上夢斷寒雲中

送僧有言之天台

周啓明

講寺金庭遠香文玉篆連船中鳴夜磬雪裏見新年山
盡城臨岸雲空海照天莫嫌通剡客僧舍枕花川

送天台進長老

鮑當

嘗聞台嶺秀積翠倚南天鹿下深溪飲僧從絕嶺禪浮
塵滿浮世流水逐流泉人別歸心切瓶盂上客船

送白上人歸天台

梵譯千篇廣歸心一念生浮杯識海岸持鉢去王城雨
約春莓滑香盆漏葉輕遙知守庵虎先辨錫環聲

寄國清處謙

趙湘

三江風浪隔天台想見當時賦詠才近有高僧飛錫去
更無餘事出山來猿猱歷歷窺香火日月紛紛付劫灰
我欲相期談實相東林何必謝劉雷

送龐舅大夫

張舜民

外家門館未應疎舅氏多能作大夫才命淹回猶半刺
舟船繚繞向三吳興公自有遊山賦鄭老寧無過海圖
去國長年宜自愛不須頻扣步兵厨

麝嗜酒

送舉書記歸天台

蘇庠

卷衲下蒼壁夜光容暗投人追道林輩詩入杼山流風
送蒹葭雨鴈橫江漢秋須煩紫藤杖聊與白雲留

送天台則上人還浙東

溪南溪北鳥啼處樹頭樹底梅已空絕嘆不如木上座

伴君千疊夕嵐中

送天台珪上人

雨暗蒹葭浦烟青楊柳津有勞修月手來訪卧雲人落
筆向來事無錐今歲貧故山何處是落日大江濱

送呂山友遊天台

床頭蘿月厭同攀發興東吳萬疊間森木已深溪上屋
瘦藤穿盡雨餘山黃梅綠李看來熟長簾北窓誰與閑
此別故應頻作惡一樽何日慰勤艱

送僧遊天台

王安石

天台一萬八千丈，歲晏老僧攜錫歸。
前程好景解吟否，密雪亂雲緘翠微。

榮上人遽欲歸以詩留之

道人傳業自天台，千里脩然赴感來。
梵行毗沙為外護，法筵靈曜得重開。
已能為我迂神足，便可隨方長聖胎。
肯顧此山如慧約，與公西崦斲莓苔。

遊天台桐栢觀

羅適

欲訪琳宮入翠微
滿山烟雨正梅時
神仙事祕人難問
造化功深世莫知
海近應通三島信
年多空見八分碑
身中龍虎吞天地
誰肯留心繼鍊師

金庭福地竟如何
當日山前異事多
子晉高風傳世表
仙翁遺跡在巖阿
三清路遠須由學
九轉功成豈怕魔
我有玉符真訣在
黃衣誰肯遠相過

題石橋

孫何

六月巖崖似九秋
興公辭賦好淹留
杉松迤邐連華頂

鐘磬依稀近沃洲
枕水古碑卿相撰
拂雲新刹帝王修
高僧盡解飛金錫
誰是當年白道猷

惠崇

千尋亘絕險危步
想仙翁日上霞紋
斷春生雪溜空虹
形離碧水輪勢入
青穹人世何由及
惟應天漢通

趙企

紺宇凌雲接太和
縈回委曲過山阿
靈峯散彩祥光滿
寶蓋浮花景象多
瀑布迅從雙澗落
禪徒爭向一梁過

何當擺脫塵埃路洗去人間萬事磨

送僧歸天台

左緯

還尋流水去水極到天台時把碧雲句寄將黃葉來石
門高賺雪溪塢曲巖梅貪看故山色不知春已迴

次韻王似之過天台

彩旆搖霜宿鳥驚旋將疾苦問民情從容會歷三臺遍
謦欬先看數路清紅日盡頭思玉闕赤霞深處見瑤京
信知子晉真苗裔仙籍還居第幾名

次韻朱承事題丹丘

白雲城郭照通衢未怕雲烟屬五湖萬疊暮山屏自展
一江春水練初鋪輸他夫子供吟筆沒箇閑人與畫圖
子晉玉簫聲已斷不知笙鶴更來無

次韻呈天台宰

僕也不自知愛詩已成癖有作盈一囊無人為攢撫將
求識者觀千里事行役揚舠入武林襦刺久未釋一日
謁尚書尚書為虛席號僕以詩人聲名從此得日上尚

書堂見公於侍側公時訪天台頗恨未嘗識洎僕將告
歸贈言羨好色歲月不我留八年如頃刻俄聞綰銅符
無乃慰平昔自古神仙才多居隱吏職豈不見王喬葉
縣飛雙鳥又不見葛洪勾漏留丹石付公以天台人事
有中的茲山八百里窈窕多奇迹桐栢古洞天金庭在
其域三災不能侵歷數無終極景命今始興吾君壽千
億公名亦俱傳何啻登仙籍僕雖生此邦仙果未得食
今日反問公何處桃花碧公疑我骨凡未肯言消息骨

凡安敢辭此桃亦終覓

送齊上人遊方

往究一乘法期明諸祖燈
遠山銜落日空谷響殘冰
離物心無染談經義有憑
世人多頂禮為是石橋僧

桃源洞

劉郎何用憶塵寰舊路重尋事
已難古意飄零無處覓
藤紫溪色上欄杆

浮盃石上坐多時手弄滄浪客
思遲片片落花收拾看

洞中疑有舊題詩

青山簇簇水灣灣
洞戶應將玉鎖關
飲罷出來紅日晚
一聲雞犬悟人間

天台道中

亂山深處是仙家
海變桑田日未斜
為有慈親倚門望
却愁溪上見桃花

石新婦

煙蘿為髻霧為巾
獨立江邊經幾春
無故被他呼作婦

不知誰是畫眉人

崇教寺

只把山為界紅塵自此分
竹窓吟聽雪苔石坐看雲意
靜詩先到心清道自聞
深慙王許輩猿鶴舊同羣

尋委羽洞

委羽不知何處是
倩人扶上木蘭橈
欲尋去路花稍密
爭認行雲酒浪搖
流水忽隨山脚轉
洞天疑把杖頭挑
逡巡不覺東風晚
始有仙人弄玉簫

寧海簿廳交翠亭

地勝多喬木亭幽闕古墉春梢經雨合晚色過煙濃影
落琴書遍聲穿戶牖重鸞棲應不久枳棘若為容

遊九峯

入山須判宿不宿謾區區泉脉尋還有蘭香嗅却無杉
高方見直石怪不成巖若到三潭頂歸時路更迂

天台石橋

咄哉橋畔客何不向前行自是君心險無從此地平銀

河千尺到金劒一稜傾故我諸緣斷惟聞流水聲

趨石橋初登山嶺

趙岫

天梯欲上使人愁身御長風不自由下視白雲生澗底
仰看紅日在山頭共傳此處迷劉阮自恐今朝犯斗牛
歸路似從霄漢墮却來塵世得羈囚

游石橋遇隱者

云辟穀三十年矣

趙鼎臣

巨石引飛梁奔泉瀉纖縞行攀石上藤坐聽林間鳥茲
遊既物外此地即天表曠然脫塵囂率爾慕輕矯道逢

餐霞人邂逅愜幽討絕糧三十年顏色長美好云此巖
上芝可得終歲飽盛談山中趣似欲容吾老平生苦因
循學道真不早憂患日煎熬精神歲消槁況為官拘攣
而與事纏繞悲歡相乘除失多殊得少君言會可思待
我婚嫁了

過天台道中作

夏竦

驅馬天台路悠悠漸向晨雲開忽見寺山盡偶逢人細
雨踈篁長微煙古木春行行逢驛道落吹起清塵

石橋

斷澗橫幽石蒼然古木陰
欹危接山背迢遞過雲心
峭壁旁千仞飛流下萬尋
秦人若驅策蓬島路非深

秋日登巾山懷道人

舒 亶

不見風流李謫仙
彩牋誰繼碧雲篇
黃花零落芙蓉老
惟有青山似去年

石橋

李 鎔

兩溪合派一橋橫
似雨聲喧瀑布傾
茶點成花金葉嫩

香焚飛篆蕙煙輕
天寧賢聖空中望
佛國山林路上行
洗滌塵懷舊腸肚
自新省悟利兼名

原闕

葉清臣

遊石橋

張擴

亂山雲冥濛
脩徑石盤錯
聲聞住世界
窟宅遍岩壑
我

行適過雨萬籟響天樂石梁定鬼設險滑不容腳臨流
輒生怖政墮葱韭惡猶忻曇花供尚及薦杯酌分嘗不
敢餘稽首謝發藥

成大亨

曇花亭下卧晴虹兩瀑交流雪噴洪已許銀燈觀濬壑
未瞻秋月印長空龍盤脩榜千峯霽金吼霜鐘半夜風
念我宿根惟德本為除冥障與心通

題佛隴

陸煥

天下紛紛吹戰塵我來佛隴悟修真依然猿鶴如相識
知是山中幾世人

題黃巖妙智院內照庵

趙抃

山老榜庵名內照掩扉默坐從觀妙欲知畢竟事何如
無量壽光踰兩曜

題仙居縣南峯

郭明甫

山光竹影交寒輝下有碧浸吹連漪沙痕隱隱白鳥去
石聲鑿鑿扁舟歸蕙蘭發香禪味遠雲霧吐秀人家稀

須知春事不可挽杜鵑已繞林中飛

天台夜雨作

姚寬

瘴海遠粘天山城集暝煙春潮生蛤蜊

土人謂蛤一潮生一暈夜

雨長蝸涎燈几花時落風簾客未眠平生懷此地今夕
意茫然

行諸山道中

陳公輔

我曾天台游於今四十載一朝忽復來時節如有待形
骸覺老景景色殊不改雨中尋舊跡觸目雲巖巖瀑

落千尋澗花紛五彩崖深蘚蒼蒼溪淺石磊磊昔時所未到足力胡可殆要當至絕頂直下小滄海茲山八萬丈端的不吾紹偉哉造化功疑若有真宰黃精煮堪食茯苓良可採何當誅茆居此志終有在

游普慶院

滿目雲煙萬疊山梵宮深鎖翠微間市朝多少紛紛客輸却僧家一味閑

天封瑞雲閣

晴雲漠漠水潺潺危閣春歸白日閑
若問祖師消息處眼前環列是青山

侍先人游石橋

沈晦

一別台山四十年石橋風景尚依然
慈顏不見身空老感恨多如澗底泉

留題紫巖寺

松嶺楓岡勢接連梵宮危傍紫巖前
夜深鐘磬敲清月日暮樓臺鎖淡煙
大抵登臨須有分不因遷謫到無緣

卷下
一程已見佳山水何憚東川路五千

為愛溪山著意尋因行每每便登臨
寒窓夜久陪僧話
一陣西風月滿林

望天台山二絕

陳恬

嵩陽不得到華頂可徘徊當知吾性分自有一天台
氣驟煙雲速風飛山嶽摧神遊八極表何必訪天台

天台郡讀道經寄明逸十絕

任太初

十匣瓊文一炷香清閑把讀興何長
終須為覓王喬信

與寄明晨夏侍郎

王喬謂王子喬也得道於天台山明晨侍郎仙官名夏馥嘗為之出真誥

晴檻遠分天姥雪幽窻時入枯蒼雲高閑有味無人愛

手把仙經只憶君

楊許靈書萬古傳東明公本是真仙他時載會終誇向

一月曾遊四洞天

桐栢赤城枯蒼蓋竹俱在天台郡之側左

西昇讀徹諷南華琴劍蕭條似道家羽客不來來忽見

定應相勸學餐霞

吟齋一逕雨苔斑門掩羣書白日閑還似三茅與諸許

當年寂寞住空山

春潮城郭海霞岑
諷罷黃庭即縱吟
誰向貳卿同志說
掩扉還似卧雲林

寶篆慵看玉瑟橫
憶山無睡過初更
却思重向天台宿
瀑布巖前看月明

自喜尋真得妙門
雙瞳日月照乾坤
憑誰說向陶弘景
華蓋雲深曉又昏

掩卷開扉海月生
靜思潛喜復關情
赤城桐栢俱遊了

只未乘輅到四明

寒山疊疊雪冥冥獨坐丹丘古驛亭自覺近來心骨健
因看十匝洞真經

天台石橋

趙湘

白石峯猶在橋橫一徑微多年無客過落日有雲歸水
淨苔生髮山寒樹著衣如何方廣寺千古去人稀

天台思古

遊人行盡天台路仙家杳杳知何處惟有山前一派溪

落花依舊流春暮

天台妙蓮閣

張舜民

休論雪竇與雲峯且看天台劒戟叢萬水千山來閣上
一花六葉見池中誰將色界填空界不離香風席祖風
有底妙蓮談不盡却成賦筆與興公

原闕

陳堯佐

贈天台僧

江為

白髮經年復白眉，齋身多病已無機。
曾來越客留詩板，舊識蕃人送衲衣。
岩竇夜禪雲樹濕，石橋秋望海山微。
結庵更擬尋華頂，晚歲應容扣竹扉。

廉上人歸天台

廉公與秘閣黃少卿相善

楊億

舊住赤城華頂峯，桂巖芝崦白雲重。
彌天曾並習鑿齒，入洛因尋陸士龍。
寒燭伴吟經臘雪，雨花開講過中鐘。
浮漚一念歸心起，本寺房前見偃松。

擇良上人歸天台

片席然犀經水府幾程登陸望霞標吟情晚日繁雲合
歸路秋風密葉凋行道六時廬嶽漏浮栢千里浙江潮
舊房宴坐觀空後香積多年飯頓銷

送蔡駟守天台

蔡肇

天台四萬八千丈玉京五城十二樓欲乘西風跨獨鶴
直渡南斗騎牽牛麻姑長爪快搔背巢父投竿應掉頭
廣文物色分留在二妙能詩肯罷休

石橋道中三首

盧襄

牛羊日晚下煙坡病眼看花手自摩
千里家鄉曾夢到
一年風景最春多樽前有酒須相覓
眼底無愁可奈何
王事雖勞吾敢憚猶勝乘雪下蓬婆

枕底雞聲月影殘
搖鞭驅馬上嶺岨路高蜀道九折坂
水急香山八節灘
茶異雪花生筋底
眼明金雀舞林端
凌晨只怪貂裘薄
山近天門分外寒

足根重繭寸心灰
故里田園好在哉
晚浦橫舟芳草遠
廢牆經雨小桃開
須知鞭馬駸駸去
不是尋春得得來

金定四庫全書
卷下
多謝殘年足公事因將香火訪天台

天台道中

汪藻

渺渺孤程逐鴈飛
茫茫平野見人稀
水紋縈石作蟲篆
麥隴挂山如衲衣
日月尚留滄海照
山川盡護翠華歸
春風自滿江南岸
不管人間萬事非

聞金兵入明州宿黃巖縣山奧寺

已怯驚潮渡還憂複嶺登
逢人多問數投宿只尋僧
野飯農夫恠山行稚子能
莫虞南阻海諸將解飛騰

呂丞相自天台寄示退老堂詩卷賦此

心如金石氣如虹
整頓乾坤指顧中
挽去暫成調鼎事
歸來還作釣璜翁
東山勝餞今人見
西洛耆年幾客同
圯上一編渾未用
赤松那得便從公

我公英爽笑臞仙
來占東南古洞天
幾度傾身安社稷
一朝袖手向林泉
長勞海內簪纓望
小作山中杖屨緣
謾使吳兒生意氣
涼臺燠館記他年

留題中山明慶塔院

錢 昱

數級崔嵬萬木中最堪影勢似難同欄杆夜壓江心月
鈴鐸秋搖嶽頂風重疊盡欄遮世界稀疎清磬徹虛空
有時問著禪僧路笑指丹青去不窮

舍弟書來索近詩

陳克

溪上秋風濁酒杯白頭羞見菊花開
夫耕婦饁吾將老弟勸兄酬子不來
霜露終身思建業雲山何處是天台
百年懷抱今如此縱有詩成似七哀

天台續集卷下

天台續集拾遺

詩一首奉送崇教大師歸天台山壽昌寺

楊億

暫別雲山已及瓜
方袍初日耀蘭芽
吟詩池上生春草
說法庭中散寶花
桂楫去依隨岸柳
松軒歸賞赤城霞
御書滿篋新頒得
應向三吳到處誇

七言八句詩一章送崇教大師南歸

陳堯叟

能名淨行達皇闈振錫攜瓶出翠微恩重冕旒曾召對
情高雲鶴却同歸會思蓮社寰中結杯泛潮風海上飛
不是清時未陳力便堪隨去掃巖扉

送崇教大師回天台謹吟七言四韻詩一首

阮思道

碧雲高價徹天涯珪壁清無一點瑕雙闕再承新雨露
三吳重賞舊煙霞水軒散味朝賢句松院分嘗御府茶
聞說赤城終未見盡圖何日寄京華

送崇教大師歸天台謹吟七言四韻詩一首

范貽孫

名僧高隱盡修行人說吾師最出羣
新向天台承帝澤便朝梁苑謝明君
幾程煙水趨丹闕一院杉松鑠白雲
却泛輕杯舊山去石橋秋月會聲聞

惡詩五十六言送新崇教大師謝恩後歸舊山

趙況

振錫攜瓶謁未央薜蘿衣濕惹天香
曉辭丹陛君恩重

笑指舊山歸路長何處漱泉吟夜月幾程聞雨宿雲房
他年松下敲門去應許塵襟拂石床

奉送崇教大師歸天台

梁鼎

談空玉殿君恩厚歸興蘭舟澤國賒禪室冷思滄海雪
吟樓晴憶赤城霞經吳屨滑當梅雨到寺衣香近桂花
深愧塵纓未能去石橋煎瀑共嘗茶

謹吟七言四韻惡詩一首攀送崇教大師歸天台

壽昌寺

劉少逸

道高塵俗住應難
攜錫東歸暑未殘
紫殿已承新雨露
白雲終憶舊峰巒
孤村路僻牽吟遠
峭壁泉飛入夢寒
滿篋御詩兼御札
到時松院與誰看

予得此七詩於會稽鬻書者十年矣今偶在篋中刻之天台續集後楊梁二公詩雖已載集中

闕

